

新昌縣志卷之九

知縣田瑄纂

名宦志 縣官 學官 附留績 寓賢

自西漢傳循吏後世宗之守若令能修政教吏威民惠者存則父母之歿則尸祝之誠重之也邑官師可名者未遽等埒龔黃諸君抑亦可以爲次者故表而出之志名宦

縣官

宋張公良字希留青州壽光人太平興國中爲邑令立縣治建邑庠勸民出貲克底于成其他治

新昌縣志卷之九

一

績無考然士民爲祠於學宮亦必有所感云
陳橐字德應餘姚人登政和上舍第歷任台州天台臨海黃巖改知縣事以愷悌著稱呂頤浩欲援爲御史約先一見橐曰宰相用人乃使之呈身耶謝不往趙鼎李光交薦其才紹興二年除監察御史論事不合以宰邑有治行除江西運判官至徽猷閣待制王十朋爲風土賦論近世會稽人物曰杜祁公之後有陳德應云
林安宅閩三山人紹興十二年知縣事至即修廢墜敦教化改建學宮置田養士更脩縣治坊

郭門巷祠廟築東隄以禦水患浚七星井開孝行碑民至今利賴之宋時有功於縣者安宅爲最累官尚書叅知政事士民懷之請祠于學又爲肖像立祠曰止水廟云

丁疇字世珎常州晉陵人淳祐中爲縣令值歲荒郡守命賑之疇曰欲行荒政宜緩催科欲恤小民宜優上户盖不取乃所以予而藏富實爲資貧也乃緩刑薄斂平糴勸分使有無相濟歲賴以不害旣又作新學政製祭器置學田釋奠割牲皆列圖刻石尤工文詞善篆隸後陞大理

評事民爲立碑以志思云

王世傑婺州金華人寶祐元年知縣事重建廟學修頽起廢立先賢祠于學宮製十二賢贊表林安宅之績身自設教講明理學士風大振鄰邑集講者盖數百人士民德之爲立生祠

周輔字正輔安吉人寶祐四年知縣事剛正明敏不畏強禦時丁大全引用汙吏預令州縣上供備舉手誓天曰輔頭可斷決不爲新昌開此例上命督責愈急輔持之愈確當時咸以頑令目之其後他州縣被害積五六年不已而新昌

以備故獨免云秩滿攝監察御史忌者諷臺臣劾去公論惜之

張珣字國珎宋南軒張栻之裔也登淳祐庚戌進士開慶己未任新昌令躬節儉崇禮教時百姓財困於兵而倖臣居相位者專事苛斂以稱上旨珣獨守正不阿賦役任意寬緩雖得罪亦所甘心元兵南下珣團結義勇爲守禦計邑賴以安後卒于官子孫因家于新昌今推祀名宦

元火魯思密畏吾人至元二十四年以進義校尉爲達魯花赤時兩浙鹽法峻吏民夤緣爲姦思

密力阻之而禍益熾旣而得其奸狀馳白運司民賴以安未幾有誣彩煙鄉民爲不軌者思密又辨之得釋二十六年二月賊楊振龍嘯聚婺州所至縱火剽掠愚民脅從者甚衆適思密稟事總府佐貳官從他役邑無所主軍民驚散賊入縣治火其官宇民居思密急歸計未知所出本路判官與鎮守官帥兵來援不及沿海官軍千戶崔武德等將步騎二百人至猶豫不敢進思密獨騎爲前鋒至豐樂鄉與賊會遂戰于長潭積三日不解崔死之思密出死得生次日又

整衆決戰賊敗走殺獲甚衆三月六日賊唐仲聚衆三千餘人寇安仁鄉思密先遣吏民百餘人至賊所聲言大軍且至隨率數騎突入五峰嶺賊見驚走思密鼓進追殺之初八日會有探馬赤總把桑古孫從蒙古軍三十輩過縣而震龍餘黨復寇縣號一萬三千思密輒與其軍邀擊胡蘆密射賊前鋒遂驚潰吏民乘勝追殺之十六日大司農卿脫脫與石招討各翼萬戶討震龍餘黨檄思密會東陽思密馳往盡降其衆遂歸招撫居民而新嵯兩邑得復故業士民思

其功請祀名宦祠

李拱辰字廷弼磁州滏陽人至大中爲縣令縣當兵亂後鎮守軍多悍鷙肆剽奪負郭田稻熟將收軍結茅屋晝夜宿其中民甚苦之拱辰初下車令一日盡徹去敢取民一粟者罪之嵯縣達魯花赤高閭欲效拱辰所爲衆不從毆辱閭死而復甦縱逆黨遮絕道路使不得白於上官拱辰聞之慨然歎曰恤災救鄰古之道也是可以坐視哉亟馳驛上聞犯者盡坐罪人皆壯其義云郡有蝗入境監司命官督捕至則峻刑剥

削吏民狼狽失所拱辰執其從者杖而歸其主
主者愧服居任庭無留訟日與賓佐觴酒賦詩
爲樂或遨翔田野間逢書生文士輒下輿禮之
時版籍沒於兵火拱辰親履畝丈量置魚鱗冊
比前人計慮尤精後人賴之民感其惠請祀名

宦祠

國朝周文祥淮安人洪武元年任知縣廉能剛決
爲政有方自兵燹後官民舍宇悉燬文祥蒞政
九官廨吏舍行置郵亭壇墀學校靡不經始周
備陞杭州府通判卒葬新昌子孫因家焉祀名

宦祠

曾衍字伯曼廬陵人性嗜學工爲詩文雅贍可
愛江西有十才子稱衍其一也國初爲主簿勤
惠廉潔不煩不擾政事之暇與邑人呂德升章
廷端呂不用周明德輩賡酬唱和所作有濮泉
稿壑舟記傳世列名宦祠

賈驥山東泰安州人洪武四年任公勤廉謹政
尚寬平民有訟不決者驥乘小肩輿或騎驢親
至其處與之斷分袖懷數餅食以充饑復持一
小瓢酌溪流飲之民有獻茶湯者不受公退暇

即召生徒講明理學吏講讀律令命役夫開圃種蔬一日兩食菜粥而已政化大行蒞任九年終始如一去之日行李蕭然百姓擁道挽留哭聲動地吏部考績陞刑部主事民有疑獄欲爲求生而不得者乃嘆曰奉法則枉民伸民則違法不若自死之爲愈於是從容區處家事復爲書別其親友朝退沐浴更衣自縊而死人人感嘆新昌士民設祭哭之祀名宦祠事載大明一統志

唐夔字希韶廣西全州人以弘治庚戌進士知

縣事性資明敏折獄曲盡隱衷時以神明稱之蒞事二三月庭無留牘吏卒皆令業履門不設禁有事徑入莫敢犯者訟有理屈惟畧加朴戒不傳罪立案曰倘有未直俾可他理其用法平恕類如此又省事節費奸弊肅清吏胥困餓多辭去民呼唐青天謠曰堂堂一片天萬里鏡中懸照見千人膽能雪萬民冤未幾以忤時更調東陽民涕泣送之出境留跡譙樓以志思後邑訟有不理者或徃彼求決焉累官至知府姚隆應天上元人以進士知縣事宅心公正才

敏思精專以節冗費恤小民爲務凡斷大獄必于公庭焚香告天然後以法按之其明慎用刑如此後陞南部主事去民士餽一無所受

曾時江西豐城人由舉人知縣事嚴毅有爲凡諸興革虛心講求務盡下情練達刑名屢平反冤獄貴勢有犯立拘其子弟杖之且心無偏繫覺有過誤輒對衆悔改不遑疽發暴卒民爭至喪次哭奠之有扶柩至家者士大夫多美以詩

李亞卿一絕尤傳頌云

送官情淡接官濃此是民風亦士風有客殘冬

扶冷襯求君當在古人中

新昌縣志卷之九

七

佟應龍直隸淮安山陽人由進士嘉靖元年任廉明愷悌下車首詢民瘼衆以賦役不均對龍亟爲平圖里汰冗濫黜奢靡一歸諸簡約又善通融長短補偏救弊措置張弛悉當人情意在佐小民抑豪右而不形諸聲色有請托者初不爲拒絕而臨事一斷以理於法外稍通一二以故士民無強弱咸德之至今父老稱某事善必曰佟侯佟侯云民思之爲立碑南明山肖像祀茶亭終知府列名宦祠

侯祖德直隸無錫人由監生嘉靖二年任縣丞

雅有志操時兩衙薪馬皆倍價兌納祖德于本
分外毫不敢加署縣事廉靜愛民時稱不擾有
冤獄力爲雪之侃侃不避也陞江山縣知縣終
太僕寺丞肖像西郊與佟公並祀

曹天憲字恒卿江西浮梁人嘉靖二十一年以
進士知縣事性廉直剛明不爲詭遇時承積習
九縣官公出必携坊廂盛包苴餽鄉達憲至亟
革之躬行節儉九祭祀讀飲宴饗悉從裁省官
舍中不携家累延諸生直至寢室蔬食相對厨
傳蕭然也以繁費病民乃著爲賦役成規勒石

儀門以示法邑阻山民苦夫役爲言當道悉減
省非公事者不敢徑新昌或危之對曰吾愛民
豈愛官哉持其議益堅一監司下縣甫廷叅輒
問沃洲天姥憲肅容荅曰山不在高有仙則名
今仙去矣止荒山耳監司慙而止御史舒汀風
裁嚴急人有以譖言相入者待天憲非禮憲挺
身不顧對訟呼民爲兒溫辭開諭而聞者凜凜
歲大旱躬行禱布袍芒履暴于烈日出舍寺中
凡閱月食粥茹蔬行郊間一望枯槁泫然淚下
爲文責城隍欲自焚以罪之已而霖雨洽三日

夜歲因以稔其他修文廟行鄉約表節孝種種不可殫述後陞兵部主事既去民爲立祠肖像終四川叅議列名宦祠

宋賢字及甫直隸華亭人以嘉靖甲辰進士知縣事廉明方正不務聲華繼天憲爲政一遵其約束風裁或不及而精密過之民有訟立爲剖決獄無繫囚人服其明邑田畝多墾荒或抱空稅奸巧者或饗無糧之田會上司下方田令而山谷間田穀縮輪輳當事者難之賢精于會計法乃教民習勾股履畝度田公暇乘肩輿上下

山阪躬較量之民莫敢售欺期月事竣乃編爲經緯二冊圖坵片次名號于中以便稽閱一時隱弊盡除而田賦以均民至今賴之其天性廉潔終始不渝民以曹宋並稱後擢御史既去肖像祀西郊列名宦祠

萬鵬字雲程直隸武進人少遊唐荆川門精經學善解說以嘉靖癸丑進士授松陽令改新昌性廉介不爲詭隨明習吏治尤精于律令常曰吾訓士惟一經治民惟一律朔望謁學宮必進諸生講論剖析疑義亶亶忘倦坐公廳胥吏侍

立皆有表著稟白外不敢出一言聽訟必隔別
試以情間以已意折中之無不輸服者官府聞
然時島夷倡亂自台州奄至民驚愕奔匿山谷
間鵬倉卒率民兵防禦民不知兵望見火起輒
遁去鵬間行出嵯縣得免賊掠縣市屯醴泉由
浦口至清風嶼官軍掩殺之鵬既歸謂防守莫
如城乃博謀邑人士而決其議於獨會計方廣
量丁土多寡計工程使分築之其所經築處雖
神祠墓舍促衆立壞之不顧也時或微服徃觀
眎其築不堅固者罰之俾出粟備賑民爭先効

力踰年而大功告成雉堞堅完甲於他邑初議
城時隣邑尹有譏其邑小財屈難底於成者至
是始嘆服之鵬晝夜經營至忘寢食竟以勞卒
于官室無長物惟壘菜一瓶俸米數斗而已士
民臨哭盡哀旣而思其保障之功請祀名宦祠
肖像西郊與宋公並

學官

朝國

莫旦吳江人少豪邁有才名登京闈魁選成化十三年任訓導啓迪士子古學文風一時丕振表揚節孝或親造其廬拜其墓待士子不計厚薄抑揚進退惟視其學行何如纂修縣志文辭豐贍雖立例繁碎紀載雜濫而其編摩著述功有不可泯者後獻大明一統賦與三都賦並稱京師重之

許淵字有本黟縣人由歲貢嘉靖間任教諭淵性明達有才辨尤善建白言輒稱上意嘗建議興水利舉荒政建尊經閣修號房築泮池置學田興廢舉墜學校規模煥然一新人稱東許先生獨負才名而惜其不盡用云

許效賢字子官莆田人由歲貢嘉靖間訓導與淵同時而官舍居西故人稱西許先生喜誦說仁義論難經旨辨註疏異同津津不厭口未嘗言利視諸生貧者尤加意恤之歲時餽遺輒弗受諸生有終喪而以幣見者嘆曰吾聞禮尚賙賻哀有喪也吾未之能行而又受惠于子乎亟麾去署縣事乃以贖金易田贍學其律已甚嚴

與人寬而恕課教諸生誠意懇切有犯者不少
貸人以長者稱之去之日爲立碑以志思云
周坤福建福州人由舉人嘉靖二十二年任教
諭爲人直方正大善說書凡諸儒䟽解靡不通
貫朔望升堂講饜饜不倦後開閣講授人咸服
習不爲諛佞對長官摩腹自如人益敬之冬日
猶着單夾衣曰吾冷官不宜太煖士能忍饑寒
方有受用處其論議如此稍有餘輒斥以賙貧
乏者盖自近世來學官口不言利能訓士得師
儒體無如坤者後陞國子監助教

徐憲高郵人由歲貢剛毅質直不苟取與時有
貴勢及猾民欲奪贍學田者憲執不可或于宴
會中言及憲拂衣出曰此田乃諸生燈火所資
當垂百代吾官一時耳官可去田不可奪或訕
侮之竟投劾云

留績

宋黃由字子由長洲人淳熙八年進士第一吳自有科目以來由始冠多士通判紹興府往新嵎督行荒政由改糶爲賑擅發米五萬石予民不取其直

張慮字子密慈溪人慶元二年進士授州教授爲浙東帥屬督新昌舊逋慮手書諫曰越人之瘠宜咻噢撫摩之今夏稅當寬爲之期使田里久饑之少還已耗之氣血尚可理舊逋耶力辭不行民賴少濟官至國子祭酒以爲月令之

書雖出於呂不韋然人主後天而奉天時此書不爲無助乃著講義十二卷

元陳恬字慶甫河南人至元十四年以浙東宣尉從百餘卒自福建抵新昌遇婺王山狂寇挺身當之遂爲所害邑人憐其義勇立祠于城隍廟側其事具載俞浙碑記中今祀名宦

國朝李慶順天府人永樂中任紹興知府縣主簿郭讓所行多不法邑民盧讓董讓率衆三十餘人縛之赴京至吳江平望鎮夜盜殺盧董等三十餘人郭獨不死蓋其陰謀也乃潛至京誣奏

新昌謀爲不軌朝廷命都督費瓚將兵將殲諸
邑人皆驚竄慶具奏止之邑人賴以保全而郭
遂棄市時人爲之語曰三讓不讓一邑禍降一
慶有慶百里全命後官至兵部尚書死土木之
難邑人丁川巡撫順天祭其墓立祠東門外仍
祀名宦祠
陳讓晉江人由進士任本府推官承委築東隄
經畫調度宣力效勞務爲經久計讓又加意學
校置金庭觀田贍士至今賴之

寓賢

六朝宋謝靈運陽夏人謝玄孫也博覽群書文章
美麗與顏衍之爲江左第一風流襲封康樂公
出爲永嘉太守嘗往來新昌遨遊名山父祖並
葬始寧縣遂移籍會稽後以遊放不檢爲有司
奏劾伏誅新昌人重其名因爲建康樂里即今
之忠信坊云

唐司馬承禎天台人傳辟穀導引術隱居桐栢山
唐武后時屢召不起固辭寵位至開元中被召
過新昌大悔今仙桂鄉有司馬悔山又有悔橋
再被召賜號貞一先生先期告終忽若蟬蛻弟

子歛空衣葬之

宋潞國公文彥博字寬夫汾州人

沂國公杜衍字世昌山陰人

康國公韓絳字子華雍丘人

申國公呂公著字晦叔壽州人

以上四相按舊志載石待旦開

義塾于石溪聘明道程先生為師四方來學者衆而四相少時咸集講下今攷宋史文杜生于明道之前而伯淳正叔皆嘗友于韓呂二公則四相遊新昌師明道之說恐俗傳或誤而莫志不察遂記載而繪圖之耳今質諸呂公光洵以為石待旦開義塾身自設教而四相來學其後又聘明道典塾本不同時舊志不考事之先後是以謬耳理或有然愚意以為宋都汴京而明道為河南人當時石氏為顯宦者衆或於京都與明道暨四公相為師友後世或見其姓名文

新昌縣志卷之九

十五

字有存於家因而穿鑿其說亦未可知也然邑人傳襲已久姑存之以俟博識者定議云

劉器之字安世元城人母石亞之之女也以故

器之自幼遊學石溪義塾後師司馬光官至諫

議大夫謚忠宣

朱熹字仲晦婺源人生於尤溪紹興中提舉浙

東常平茶塩公事往來新昌見新刻民饑賑之

與石宗昭石塾為師友講明性理之學塾有中

庸輯畧熹嘗采其說註中庸名為石氏輯畧又

嘗遊南明山建濯纓亭遊水濂洞留題任氏壁

皆載山川志與梁氏寫大學呂氏書坡翁竹石

卷至今寶藏弗失既而退居武夷有詩寄石斗

文斗文亦有詩答之

其詩曰病枕經年卧沃洲滿庭楓葉又吟秋書來如

見舊人面讀了還添塵世愁憂國至今遣白髮窮經空自愧前修武夷休作相思夢我已甘心

老此丘

陳傅良瑞安人登進士官至寶謨閣待制謚文節號止齋友朱熹張栻呂祖謙文名擅一時新昌大姓袁氏延典塾事嘗館黃度文叔家與石呂二氏遊其子弟多從之學郭外有報慈庵孝子呂蒙廬墓處也嘗留信宿又爲呂琰作陳巖墓碑爲呂冲之等作字說

葉適永嘉人登進士官至寶謨閣學士謚忠定號水心適雄文奧學名重當時雅以經濟自負嘗往來新昌館于石呂二氏諸大家與呂元之聲之友善爲聲之作呂丞行至今其家寶藏其翰墨

張即之字温夫歷陽人叅知政事孝伯之子由父恩授烏程丞歷官直秘閣嘗倡義辨王惟中之死時論多之以能書聞天下金人尤寶其翰墨淳祐間往來新昌典平壺陳氏義塾爲書義塾義庄桂山大字及慈教庵碑記爲呂秉南書

芳在庵竹山庄四大字與書院山長潘孚書留
耕二字又有石城二大字與米芾南明山字竝
清勁竒古爲世所重云

國朝劉基字伯溫青田人徵時嘗往來新昌與呂
不用友善每宿來青樓夜觀星象畫談兵畧或
通曉不寐時人咸呼之曰劉狂後以翊運功封
誠意伯初與呂不用別時有詩送之見得月稿
名宦總論

論曰余作志既表官師矣茲復傳名宦者何
示優異也官師不問賢否有其人則書曰名

宦則必賢有可名者然後書之也詎不異歟
然名者實之賔也盖有務實而得名者矣亦
有無實而盜名者矣名與實一時或有於混
淆而是非之在人心不終掩也余生也晚未
見其人之實且因其名而名之使人之觀斯
傳也指其人而選之曰某也實勝也某也名
勝也則斯名也不亦爲實錄也哉